

欽定盛京通志卷之六十三

歷朝人物 六

元

欽定盛京通志

卷六十三

目錄

一

欽定盛京通志卷之六十三

歷朝人物 六

元

耶律楚材。字晉卿。遼東丹王托雲八世孫。金尙書右丞履之子也。身長八尺。美髯宏聲。天資英邁。博通天文。地理。歷律。術數。及釋老醫卜之說。金貞祐三年。爲中都行省員外郎。中都陷。太祖召見。處之左右。從征西域。製庚午元。歷上之。太祖每征。必命之卜。多奇驗。嘗謂太宗曰。此人天

欽定盛京通志

卷六十三

歷朝人物六

一

賜我家。爾後軍國庶政。當悉委之。甲申。兵次東印度。駐鐵門關。侍衛見一獸。如鹿而馬尾。其色綠。作人言曰。汝主宜早還。太祖以問楚材。對曰。此瑞獸也。其名角端。解四方語。好生惡殺。今大軍征西。已四年。上天降符。以告陛下。願承天心。宥此數國人命。太祖遂還。太宗卽位。楚材奏。諸州縣長吏。專理民事。萬戶府專總軍政。課稅專掌錢穀。各不相統攝。著爲令。權貴不得志。遂爲舒穆魯。軒達布等構陷。而太宗獨察其誣。及軒

達布獲罪。太宗命楚材鞫治。楚材請寬之。太宗私謂近侍曰。楚材不較私讐。真長者。汝曹當效之。太宗至雲中。諸路所貢課額銀幣。及倉廩物料。文簿具陳於外。悉符楚材原奏之數。笑曰。卿何使錢幣流入如此。卽日授以中書省印事。無鉅細。悉以委之。時民多誤觸禁網。國法無赦令。楚材議請肆宥。條便宜十八事。太宗悉從之。金汴京將下。大將蘇布特請屠汴。楚材馳見太宗曰。得地無民。將焉用之。且弓矢甲仗金玉等匠。及官民富貴之家。皆聚此城。殺之則一無所得。是徒勞也。於是百四十餘萬戶皆得保全。又求得孔子五十一代孫。襲封衍聖公。付以廟地。及楚材奏定賦稅。朝臣皆謂太輕。楚材曰。將來必有以利進者。則以爲重矣。楚材又奏。制器者必用良工。守成者必用儒臣。請校試之。乃命以經義詞賦論。分爲三科。儒人被俘爲奴者。亦令就試。其主匿勿遣者死。得士凡四千三百人。免爲奴者四之一。楚材又請一衡量。立鈔法。定均輸。

庶政畧備。民稍蘇息。太宗嗜酒。楚材屢諫不聽。乃持酒槽鐵口以獻曰。此鐵爲酒所蝕。尙致如此。而况五臟。太宗悟。賞以金帛。太宗疾篤。脉已絕。皇后不知所爲。召楚材問之。對曰。今任使非人。賣官鬻獄。囚繫非辜者多。宜赦天下。后亟欲行之。楚材曰。非君命不可。頃之。太宗少蘇。后以爲言。乃首肯。赦發而脉生疾愈。楚材以太乙數推之。不宜田獵。爲左右慫恿。遂出獵。尋崩於行在。皇后稱制。温都爾哈瑪爾專政用事。有旨。凡

温都爾哈瑪爾所建白。令史不爲書者。斷其手。楚材曰。國之典故。悉委老臣。令史何與焉。事若合理。自當奉行。如有不可。死且不避。况斷手乎。后不悅。楚材憤悒而卒。時有譖言天下貢賦半入其家者。后命近臣覆視之。惟琴玩十餘。及古今書畫。金石遺文數千卷而已。楚材爲相。二十一年。正色立朝。不避權勢。每陳國家利病。生民休戚。辭色懇切。太宗嘗曰。汝又欲爲百姓哭耶。楚材每言興一利。不若除一害。生一事。不若減一

事人以爲名言。至順初。贈經國議制寅亮佐運功臣。太師上柱國。追封廣寧王。諡文正。所著湛

然居士集十四卷。

國語。托雲準頭也。原作突欲。舒穆魯。八旗姓。軒達布。國語。

拈香也。原作石抹咸得。蒙古語。蘇布特。珍珠也。原作速不臺。温都爾。蒙古語。解見黑龍

江山川卷。哈瑪爾。鼻也。原作奧都刺合蠻。今俱譯改。

王珣字君實。本耶律氏。金末避難遼西。家義州。

開義。更姓王。武力絕人。善騎射。曾遇道士謂曰。

君相奇甚。他日因一青馬貴。居歲餘。客有市青

馬者。珣喜。以道士言驗。倍價買之。後乘以戰。進

欽定盛京通志

卷六十三

歷朝人物六

四

退周旋。悉如意。又嘗得古刀於凌水。有警輒鳴。

故所向皆建奇功。初以鄉兵歸穆呼哩。授元帥。

兼領義川二州軍事。及張致僭號錦州。珣以全

軍會穆呼哩兵。復開義。擒揚伯傑等。錦州破。穆

呼哩悉以付珣。珣但誅致家。餘皆釋之。以功賜

金虎符。充兵馬都元帥。鎮遼東。兼義川等州節

度使。珣貌黑。人呼爲哈喇元帥。哈喇。中國言黑

也。甲申春。卒。珣爲政簡易。賞罰明信。誅強撫弱。

毫髮無徇。

穆呼哩。見名宦卷。原作木華黎。今譯改。

何實。字誠卿。北京人。父道忠仕金。爲北京留守。實少孤。依叔父居。氣節不凡。家人常入卧內。見青蛇蜿蜒衣被中。駭視之。乃實也。及長。多雄畧。驍勇善騎射。通諸國譯語。錦州張致叛。謀於實。實叱拒之。籍戶口來歸。穆呼哩與論兵事。奇變百出。拊髀欣躍。大加稱賞。遂引見太祖。選充前鋒。時張致復據錦州。實與賊遇於神水縣。挺身陷陣。以功爲帳前軍馬都督。彈壓迨取燕南齊西山右等處。畧地攻城。所向克捷。累功至元帥。左監軍。癸未。破走武仙於邢州。士民安堵。戍於邢。多善政。邢民敬如神明。太宗時。賜世爵。更賜白貂帽。貂衣。弓矢等件。以疾遣歸。

劉世英。其先范陽人。後遷遼陽川州。初。穆呼哩經畧遼東。世英隸麾下。以功充行軍副總管。庚辰。平陽諸郡被兵之餘。民物空竭。世英言於穆呼哩曰。自古建國。以民爲本。今殺掠殆盡。異日我師復來。孰給轉輸。收存恤亡。此其時也。穆呼哩善之。遂奏授絳州節度使。兼行帥事。卒。弟亨

安嗣其職。累立戰功。賜金虎符。稱爲驍將。從征巴蜀。進圍成都。有喬長官與亨安爭功。未幾攻城。喬爲砲所傷。亨安負之以出。喬感愧。亨安攻金伐宋。出奇制勝。從軍十年。所獲金帛。悉推與將佐。故士卒咸樂爲用焉。

舒穆魯額森。遼人。祖庫喀勒。誓不食金祿。父托里布扎爾。亦不仕。額森年十歲。問其父宗國之所以亡。卽大憤。及長。勇力過人。多智畧。聞太祖起朔方。匹馬來歸。首言東京爲金開基之地。蕩

其根本。中原可傳檄而定。太祖悅。命從穆呼哩取東京。額森爲先鋒。諜知金人新易留守將至。獨與數騎邀而殺之。懷其所受誥命。至東京。入據府中。夜下令。易置其將佐部伍。三日。穆呼哩至。不費一矢。得地數千里。定城邑三十二。移師圍北京。城破。將屠之。額森以上聞。得赦。進上將軍。以御史大夫提控諸路元帥府事。舉遼水之西。灤水之東。悉以付之。後從穆呼哩攻蠡州。先登中石。歿。

舒穆魯八旗姓。額森解見名宦卷。原作石抹也。先蒙。古語庫喀勒生詞也。

原作庫烈兒。托里。蒙古語解見黑龍江山川
卷。布扎爾。穢也。原作脫羅畢察兒。今俱譯
改。

田雄。字毅英。北京人。幼孤。能樹立。以驍勇善射
知名。從穆呼哩征興中。廣寧。諸郡。定府。縣。二十
有九。屢著戰功。從太宗攻西和興元等州。功尤
最。賜金符。召爲御前先鋒。招納河南降附。民皆
安堵。而別部將縱兵擄掠。雄力爲救護。至出已
財與之。民免於害。癸巳。鎮撫陝西。總管京兆等
路。時關中苦兵革。郡縣蕭然。雄披荆棘。立官府。

欽定盛京通志

卷六十三

歷朝人物六

七

招徠未降者。教民力田。京兆大治。卒。追封西秦
王。

李守賢。字才叔。大寧義州人。初與兄庭植歸穆
呼哩。入朝。太祖命庭植爲右副元帥。守賢授錦
州臨海軍節度觀察使。遷河東南路兵馬都總
兵。鎮河東。太宗南伐。道平陽。見田野不治。以問
守賢。曰。民貧窘。乏耕具。詔給牛萬頭。仍徙關中
人民墾地。河東。時河中未下。守賢請自北面鑿
城先登。如其言。城果下。由蒲津南濟潼關。破趙

雄兵時方會師圍汴。守賢留屯嵩汝。金兵十萬保少室山。守賢以三千人破之。攻河南。降其渠帥。洛西遂定。

高宣。遼陽人。太宗元年。詔宣爲元帥。賜金符。從睿宗攻大名。宣進曰。奉命出師。伐罪弔民。願勿嗜殺人。以稱上意。睿宗召元帥穆納諭之。下令軍中如宣言。及城破。兵不血刃。民心悅服。四年。從破金兵三峯山。降宣者三千餘戶。籍以獻。以宣爲鷹坊都總管。賜金符。仍令子孫世其職。卒。

欽定盛京通志

卷六十三

歷朝人物六

八

皇慶二年。贈宣力功臣。銀青榮祿大夫。大司徒。

封營國公。諡簡僖。

索倫語。穆納。冰鑿也。原作木乃。今譯改。

王榮祖。字敬先。珂長子。性沉厚。勇力絕人。襲崇

義軍節度使。入朝。上聞其勇。選三力士與搏。皆應手而倒。討金平章政事葛布格。所至有功。授北京等路征行萬戶。換金虎符。伐高麗。圍王京。高麗奉表入貢。擒布希萬努。再伐高麗。破十餘城。降天龍諸堡。皆禁暴掠。民咸悅服。移鎮高麗。募民屯戍。闢地千里。中統元年。詣闕。世祖慰之。

曰。卿父子勤勞於國。誠節如一。授沿邊招討使。兼北京等路征行萬戶。還鎮卒。葛布格。蒙古語。布格。巫也。原作

葛不哥。布希萬努。見名宦卷。原作蒲鮮萬奴。今俱譯改。

趙良弼。字輔之。女直人。愨之子。明敏多智畧。舉

進士。世祖在潛邸。召對稱旨。擢邢州幕長。己未

世祖南征。召參議元帥事。兼江淮安撫使。良弼

親執桴鼓。為士卒先。五戰皆捷。所至禁焚廬舍。

殺降民。宣布德意。人皆安堵。及參議陝西省事。

蜀人費寅。以私憾誣廉希憲。商挺。在京兆有異

欽定盛京通志 卷六十三

歷朝人物六

九

志。引良弼為徵。帝詰良弼。良弼泣曰。二臣忠良。

願剖臣心以明之。帝切責良弼。至欲斷其舌。良

弼誓死不變。帝意解。費寅卒。以反誅。至元七年。

奉使日本。至金津島。金津守延入板屋。太宰府

官陳兵四山。脅取國書。至於再三。良弼曰。不見

汝國王。寧持我首去。書不可得也。日本知不可

屈。遂遣使入覲。良弼復命。帝曰。卿可謂不辱矣。

後帝將討日本。三問良弼。皆力言勿擊。便從之。

十一年。同僉樞密院事。屢以疾辭。得旨居懷孟。

良弼有地三千畝。乃析爲一。六與懷州。四與孟州。皆永隸廟學。以贍生徒。嘗言人情之難制者。怒爲甚。必克已然後可以制怒。必順理然後可以忘怒。能忍所難忍。容所難容。事斯濟矣。卒年七十。贈推忠翊運功臣。太保儀同三司。追封韓國公。諡文正。

伊奇哩。女直人。幼穎悟。能記誦。及長以孝友聞。事世祖於潛邸。備宿衛。至元七年。命爲監戰。以所領軍圍襄陽。一時名將索多。劉國傑。李庭等

皆隸麾下。攻樊城。率衆先登。受賜悉分與將士。從巴延南伐。以兵破宋將夏貴於訪邏汴。加定遠大將軍。及攻常州安吉。皆有功。十三年。宋降。巴延命伊奇哩監守其宮。號令嚴肅。秋毫無犯。拜鎮國上將軍。浙東宣慰使。鎮守紹興。

國語。伊奇哩。一

連也。原作謁只里。蒙古語。索多。大翎也。原作峻都。巴延。解見疆域形勝卷。原作伯顏。今俱改譯。

趙炳。字彥明。惠州人。幼失怙恃。鞠於從兄。歲饑。遇盜將殺其兄。炳年十二。泣代死。盜驚異。舍去。

甫弱冠。侍世祖於潛邸。以恪勤蒙眷。署爲州長。中統元年。判北京宣撫司。北京控制遼東。番夷雜處。號稱難治。炳至皆安定。濟南妖人作亂。炳爲濟南總管。止罪首惡。餘黨解散。復遷遼東提刑按察使。遼人聞其至。豪猾屏跡。至元九年。授京兆路總管。兼府尹。皇子安西王開府於秦。時多納炳言。免逋捐賦。秦民大悅。王薨。炳被旨入見。具陳民間利害。因言王薨之後。運使郭琮。郎中郭叔雲。弄權不法。帝卽令乘傳偕勅使往按。至則琮等假嗣王旨。收炳妻孥。徙炳等於平涼北。崆峒山。炳子仁榮訴於上。上馳使脫炳。琮等醉使者以酒。遣人毒炳於獄。其夜星隕。有聲如雷。帝聞之。撫髀嘆曰。失我良臣。俄械琮等至。親鞫得其實。命仁榮子刃琮叔雲於東城。詔雪炳寃。贈中書左丞。諡忠愍。

高天錫。宣子。事世祖於潛邸。甚見親幸。中統二年。授父官。尋改燕京諸路總管按察司副使。天錫與丞相言曰。農桑衣食之本。不務本則衣食

不給教化不興古之王政莫先於此願留意焉。丞相以聞遂命立司農司以天錫爲中都山北道巡行勸農使遷司農少卿進兵部尚書卒後贈推忠保義功臣太保儀同三司上柱國追封營國公諡莊懿子諒後亦官至兵部尚書卒諡宣靖。

劉國傑字國寶女直人姓烏庫哩後改劉氏國傑貌魁雄善騎射膽力過人從巴延攻宋襄樊及南征破張世傑兵有功加懷遠大將軍賜號

巴圖巴圖者華言勇敢之稱也。至元二十三年平湖南廣東寇盜二十五年平湖南盜詹一仔餘衆悉降或請盡阬之國傑曰多殺且不可况殺降耶乃相地爲三屯遷其衆屯守以備賊後皆爲良民二十七年江西盜起國傑下令往擊賊諸將皆曰此他省盜我勿與聞國傑曰縱敵生患患將難圖豈可以彼此言耶遂進兵連破之又破永州盜李末子千七及上思州黃勝許取賊巢地爲屯田募慶遠諸獠人耕之以爲兩

江蔽障。上遣使即軍中賜以玉帶。元貞元年。加湖廣行省平章政事。經營茶陵衡郴桂陽之地。東盡交廣。西亘黔中。皆設屯戍守之。盜賊遂息。大德五年。羅鬼女子蛇節反。賊多健馬。官兵戰失利。詔國傑討之。國傑令人各持一盾。布釘其上。俟陣合。棄盾偽遁。賊果逐之。馬遇盾皆倒。遂大敗賊。擒斬蛇節。臺臣言國傑在軍中。每以家財賞士。帝命倍償之。國傑常言。吾爲國宣力。視死如歸。雖身棄草野。不恨。何必馬革裹屍還葬。

哉。平日推誠待士。故戰則有功。江西。湖廣。廣東。雲貴諸盜。以次削平。卒。贈推忠効力定遠功臣。

光祿司徒柱國。封齊國公。謚武宣。

烏庫哩。原作烏古倫。巴圖

蒙古語。解見疆域形勝卷。原作霸都。今俱譯改。

張庭珍。字國寶。臨潢全州人。父楫。仕金。後來歸授爲北京都轉運使。因家北京。憲宗即位。以庭珍爲筆且齊。時高麗徙江華島。命庭珍往問其故。其王言。大軍歲入侵掠。避而走險。不得已也。因厚賂庭珍。却之歸。以狀聞。帝爲禁戍兵無擅

入其地高麗遂安。世祖卽位。將北伐。以庭珍熟知西京入漠南路。授同僉土番經畧使。至元六年。安南國入貢不時。以庭珍爲安南國達魯噶齊。由大理至安南。世子光昞立。受詔。庭珍反覆責之。光昞慙憤。使衛兵露刃環立。庭珍解所佩弓刀。坦卧室中。曰。聽汝所爲。光昞及羣下皆服。遂入貢。及從伐宋。累功至南京路總管。兼開封府。開封有控鶴軍。賃大宅聚居。縱橫街陌。庭珍察其必爲盜。急捕之。果然。索其黨。俱殺之。民以

爲神。河決太康。漂溺千里。庭珍括船縛筏。載糗糧。四出救之。全活甚衆。俄卒於官。庭珍性清慎。丞相巴延嘗語人曰。諸將渡江。無不荒貪。惟我與國寶始終自守。聞者以爲知言。蒙古語。筆且齊。寫字人也。

原作必闡赤。達魯噶齊。解見名宦卷。原作達魯花赤。今俱譯改。

張庭瑞。字天表。庭珍之弟。幼以功業自許。兵法地志。星歷。卜筮。無不推究。以宿衛從憲宗伐蜀。爲先鋒。中統二年。戍守青居。築城虎嘯山。宋將夏貴以重兵圍之。庭瑞堅守。以全城有功。及圍

重慶舟楫兵仗糧儲。皆倚以辦。蜀平。陞諸蠻夷部宣慰使。礪門羌入市爭價。殺人被繫。羌酋謀劫之。已斷繩橋。魚通司來告急。左丞汪惟正問計。庭瑞曰。羌俗以鬪殺爲勇。今如蜂毒一人。而卽以門牆之寇待之。不可。宜遣使往諭禍福。彼自回矣。惟正卽以庭瑞爲使。果不勞兵而罷。都掌蠻叛。命庭瑞討之。蠻聯松枝爲牌自蔽。庭瑞所射矢。出其牌半斡。蠻驚曰。何用弓矢如此之力。卽請服。授敘州等處蠻夷部宣撫使。改潭州路總管。

耶律有尙。字伯強。遼東丹王十世孫。有尙資識絕人。篤志好學。受業許衡。遂於性理。而尤以誠爲本。人莫不服。爲有道君子。至元十年。衡還鄉里。朝廷乃以有尙爲助教。嗣領其學事。久之。出知薊州。以寬簡得民。裕宗在東宮。召爲詹事長史。復除國子監司業。時學館未建。師弟子皆寓居民屋。有尙屢以爲言。二十四年。朝廷乃大起學舍。始立國子監。及監官。而增廣弟子員。於是

有尙陞國子祭酒。儒風爲之丕振。尋以親老辭職。大德時。以安車召之。復起爲昭文館大學士。兼國子祭酒。有尙前後五居國學。其立教以義理爲本。而省察必真。以恭敬爲先。而踐履必端。身爲師表。數十年海內宗之。猶昔之宗衡也。以年致仕。朝廷賜楮幣七千緡於其家。卒年八十六。諡文正。

鄂屯希愷。女直人。父保和。以元帥領保定順德諸道農事。凡闢田二十餘萬畝。致仕卒。希愷襲

勸農事。郡縣水旱。力請蠲租。及調知冀州。變健訟之俗。奪蒙古所侵民田歸於民。陞河中知府。秩滿歸。應調。以不見權臣阿哈瑪特。降知景州。

鄂屯解見選舉卷。原作奧敦。蒙古語。阿哈瑪特。長子也。原作阿合馬。今俱譯改。

李希賢。遼東人。延祐間。爲臨武令。愛民禮士。獄訟清明。常語人曰。君子學道則愛人。自然生明能斷。去任後。邑人立石頌德。題其額曰學愛。

達實布哈。高天錫之孫。諒子。成宗命世其祖父官。以居喪辭。延祐四年。帝謂之曰。汝祖嘗爲司

農。今復以授汝。遂遷榮祿大夫大司農。英宗居東宮。達實布哈撰前代嘉言善行。名曰承華事畧。并畫豳風圖以進。帝覽而獎諭之曰。汝能輔太子以正。朕甚嘉之。命置圖書東宮。俾太子時時親省。達實解見選舉卷。布哈解見名宦卷。原作塔失不花。今譯改。

王克敬。字叔能。大寧人。幼奇穎。丞相鄂勒哲一見許為令器。朔土習尚少文。克敬獨孜孜為儒者事。既仕。累官江浙行省左右司都事。時番陽大饑。總管王都中出廩粟賑之。行省欲罪其擅

發。克敬曰。番陽去此千里。比待命。民且死。彼為仁而吾屬顧為不仁乎。都中因得免。拜監察御史。遷左司都事。時英宗勵精國治。丞相拜珠請更前政不便者。會議中書堂。克敬首言江南包銀。民貧有不能輸者。有司責之役戶。當罷之。兩浙煎鹽戶。牢盆之役。其重者尤害民。當免其他役。從之。泰定中。出為紹興路總管。有惠政。尋由叅知政事。行省遼陽。俄除江南行臺治書侍御史。又遷淮東廉訪使。以正綱紀為已任。不縱貪

墨不阿宗戚。聲譽益著。入爲吏部尙書。元統初。爲浙江行省參政。年五十九卽請老。謂人曰。穴趾而峻墉。必危。再實之木。必傷其根。無功德而忝富貴。何以異此。卒封梁郡公。諡文肅。蒙古語鄂勒哲

壽也。原作完澤。拜珠。住也。原作拜住。今俱譯改。

崔敬。字伯恭。大寧惠州人。通刑名法律之學。天曆初。累官至中書椽。至元六年。拜監察御史。時旣毀文宗廟主。又削文宗后皇太后之號。徙於東安州。而放其子雅克特穆爾於高麗。敬上疏。

請迎歸太后太子。以全母子之情。盡骨肉之義。又上疏諫天子巡幸上都。宜御內殿。其畧以爲當與宰臣謀治道。經筵進講。究古今盛衰之由。時帝數以歷代珍寶。分賜近侍。敬切諫。以恩不可濫。乞追回所賜。以待有功。是年。出僉山北廉訪司事。至正初。遷河南。又遷江東。所至抑豪強。惠下窮。洗冤滯。興學勸農。百廢具舉。十一年。遷同知大都路總管府事。直沽河淤數年。委敬浚治之。不三月告成。咸服其能。十五年。爲濟寧屯